

REGIONAL NEWS

HEADLINES:-

1. Cyclone Remal avanga Thawhlejni-a Aizawl district chhunga mi 34 thihna thlengah tun thlengin ruang 29 lakchhuah tawh a ni a, ruang la hmuh loh 5 a la awm.
2. Aizawl Municipal Corporation (AMC)-a bial 19-na leh Sakawrtuichhun local council member pakhat thlang tura vote thlak ni atan June ni 25 ruat.
3. Lok Sabha inthlan thawsarihna leh a tawpna ber chu vawiin khan tluang taka neih a ni.
4. Tuialhthei zuartu company te chuan eirawngbawlina Commercial LPG gas man chu unit khatah cheng 69 leh duli in an tihnam.

<><><>

DISASTER

Cyclone Remal avanga Thawhlejni-a Aizawl district chhunga mi 34 thihna thlengah tun thlengin ruang 29 lakchhuah tawh a ni a, ruang la hmuh loh 5 a la awm.

Nimin a Aibawk ami Pi Vanlalruali (34) ruang Hortoki bul Tlawng lui atanga lak chhuah hnu-ah vawiin khan ruang zawn hi chhonzawm leh a ni a. Chanchinthar buatsaih lai thleng hian ruang hmuh belh a la awm rih lo a. Ruang la hmuh lohte hi Melthum-ah pali leh Aibawk ami Pi Vanlalruali pasal Pu Matthew Lalchhanhima ruang te a ni. Naktuk chawhma lamah ruang zawn hna hi chhonzawm leh a nih dawn thu YMA hruaitute chuan an sawi a ni.

Hetih lai hian Prime Minister Narendra Modi chuan tunhnaia Cyclone Remal avanga chhiatrupna thlenga nunna chan te Prime Minister National Relief Fund atangin cheng nuai 2 theuh pek an ni dawn thu a puang. He thu hi nimina Social Media account kaltlanga sawiin Prime Minister chuan Mizoram bakah hmarchhak state dang Assam, Manipur, Meghalaya, Tripura bakah West Bengal-a Cyclone Remal tuar te zinga inhliam te zangnadawm na'n cheng sing 5 theuh pek an ni dawn a ti a, chhiatna thleng avanga nunna chan chhungte chu cheng nuai 2 in Prime Minister National Relief Fund atangin pek an ni dawn a ti bawk.

Prime Minister chuan tunhnaia India hmarchhak state hrang hrang ten khuarel chhiatna an tawh chu pawl a tih thu sawiin Sawrkar laipuiin tanpui an ngaihna lai kawngah a inhawng reng a ti a, Sawrkar mi leh sa te enpui a, vil reng tur an dah tih sawiin chhiatna avanga chhungte leh laina hnai chan te chu a tawrhpuil takzet a ti bawk.

<><><>

SEDP TEACHERS

MNF sorkar liam ta-in a lak SEDP sum hmanga Education department hnuai a zirtirtu bakah LDC leh 4th grade te chu an hun tawpin vawiin atang hian an chawl ta.

School education minster Dr. Vanlalhlana chuan SEDP zirtirtu ai a tam zirtirtu lak an nih tur thu a sawi a. Dr. Vanlalhlana chuan tun dinhmunah SEDP Teacher te chu anmahni thlaktu tur lak fel la ni chiah lo mah se kumin June ni 1 atangin an chawl dawn tih a sawi a. Thla hmasa May ni 29 khan zirtirtu thar lak tur atan hian exam buatsaih tawh niin, a tlingte erawh Election Model Code of Conduct a

zawh hunah puan a ni ang, a ti. Education Minsiter sawi dan chuan SEDP Teacher chawl turte hi mi 1,100 vel an ni dawn a, hetih lai hian zirtirtu lak thar tur hi mi 1,400 vel an ni dawn thung a. Zirtirtu ngai chhawr nawn ni dawn lo mah se zirna kawngah harsatna a awm dawn lo niin a sawi bawk.

Mizoram sorkar chuan SEDP zirtirtu thlakna tur ni a ngaihin a nghet lovin a la dawn a, kumin March ni 15 khan advertisement a ti chhuak tawh a, casual teacher hi High School atan mi 350, Middle school atan mi 371 leh Primary school atan mi 694, a vaiin mi 1,415 lak tum a ni.

School Education Minister sawi dan chuan, SEDP hnuai LDC leh 4th grade te pawh chawltir an ni ve dawn tho a, mahse Finance Department lamin an aiawh tur lak a la remtih loh avangin mi thar lak an ni dawn rih lo thung.

<><><>

DRUG-FREE WALK

Tukin khan Mizoram Police department huaihawtin Aizawlah ruihhlo do na kawngzawh buatsaih a ni

Ruihhlo Do kawngzawh-ah hian Aizawl Chanmari Kawn atanga AR Ground Lammual thleng ke a kalin Chief Minister Pu Lalduhoma hovin kawngzawh a ni a, Lammualah hun tawi hman niin Chief Minister chuan chak zawka ruihhlo do a nih theih na'n sawrkar in ñan a la dawn tih a sawi. Pu Lalduhoma chuan drugs vangin kum naupang tak tak thi an tam tih sawiin ram leh hnam a tichhe nasa hle a ti a. A bik takin mipa thi an tam tih sawiin mipa leh hmeichhe inbuk tawna chu ruihhlo in a tichhe mek tih sawiin khawvela mihring dam rei zawng chhutah Mizoram chu a dam rei lo ber pawl a ni mek a ti. Mizoramin harsatna a tawh mek chu chak zawka do let a nih theih na'n sawrkarin hma a la dawn tih sawiin 'Ruihhlo Do Core Committee' hmangin bul an tan a ti a, Excise Department kutah supply tih tlem hna mawhphurhna-ah dahin demand tih tlem lam Social Welfare kutah an dah a ti a, fel takin hmalak dan tur an thliar tih a sawi.

Chief Minister chuan ruihhlo do hna chu Central YMA kutah an innghat thuk hle a ti a, Covid inkhuahkhirhna nasa tak kalpui a nih laiin ruihhlo a tlem hle a, a ngawlvei ni a hriatte'n an lo nghei thei hle tih hriat a ni tih sawiin ruihhlo chu Mizoramah tih tlem hrim hrim leh zalen tir loh chu an duh ber a ni a ti a, sawrkar hmalakna chu mi tinin thlawp turin a ngen tih a sawi bawk.

Home Minister Pu K. Sapdanga pawhin thusawiin, ruihhlo chu an za-in tibo vek thei lo mah se nasa taka tih tlem a ngai a ti a. A buaipuite tlem tham siin a nghawng a lian em em tih sawiin hnam hmelma a nih avangin theihtawpa tangruala do a pawimawh tih a sawi.

Higher Secondary School chin lemziak intihsiak lawmman sem a ni a, Assembly Speaker Pu Lalbiakzama bakah Minister zingah Pu C. Lalsawivunga, Pi Lalrinpuii te leh Adviser to Chief Minister, MLA leh sawrkar mi pawimawh dang te pawh an tel a. School 15 telin Tlawmngai pawl hrang hrang 5 leh Assam Rifles, CRPF leh BSF te an tel bawk a ni.

<><><>

AMC BY-POLL

Aizawl Municipal Corporation (AMC)-a bial 19-na leh Sakawrtuichhun local council member pakhat thlang tura vote thlak ni atan June ni 25 ruat.

State Election Commission chuan AMC ward 19-na leh Sakawrtuichhun local council member pakhat thlanna atan hian hriattirna a tichhuak a. Kulikawn, Tlangnuam, Saikhamakawn, Melthum leh Hlimen local council-te huam AMC ward 19-na a inthlan that a ngaihna chhan hi he ward a thlan tlin Pi Baryl Vanneihsang, nikum assembly inthlan a a tlin tak hnu a he ward hi a chhuahsan vang a ni a. Sakawrtuichhun local council member thlanna buatsaih a nih chhan chu an local council member pakhat a thih vang a ni. State Election Commission inthlan hriattirna nimina a chhuahah chuan hriattirna chhuah atangin chuh tumte hming pekluh tan theih a ni ang a. June ni 6 thleng chuh tumte hming pekluh theih hun hawngin a tuk June ni 7-ah endik a ni ang a. June ni 10 thleng chuh tumte inhnudawh theih hun hawn a ni ang. June ni 25-ah vote thlak in vote thlak zawh atangin vote chhiar nghal a ni ang a. Vote that ngai a awm chuan June ni 26-ah thlak that a ni ang a. June ni 28-ah chuan inthlan leh a kaihnawih zawng zawng zawh fel tawh tura tih a ni.

<><><>

MPCC

Mizoram Pradesh Congress Committee (MPCC) chuan state danga inthlan duty a kal Mizoram Police-te'n vote an thlak ngei theihna atana Gauhati High Court-a thu an thehluk chu court hian a hnawl niin an sawi.

Vawiina chanchinbumite an kawmnaah MPCC hruaitute chuan state pawna inthlan duty-a kal Mizoram Police 1,047-te chanvo humhim tumin Gauhati High Court (Mizoram Bench) ah an kal niin an sawi a. An thu thehluk pawh hi ngaih pawimawha nei a ngaihtuah sakim niman Motion Hearing a awm a. Amaherawhchu vanduai thlak takin High Court hian an ngenna te a tihlawhtlin sak theih dawn loh thu sawiin an thu thehluk pawh hnukdawh leh mai turin thurawn a pe niin an sawi a. Mizoram police te'n vote an thlak theih na'na an hma lakna a hlawhtling ta rih lo hi pawin an tih takzet thu an sawi a. Congress chuan Police hotu mi hming tha, Home Secretary thleng thei, sawisel kai lo MP candidate ah an hmang ni-in an sawi a. Sorkar dinglai chuan Police 1,047 ten an vote vek an hlauh vangin vote nei thei lovin hmanhmawh takin duty turin thawn bo ta em ni tih chu an zawhna a nih thu an sawi a ni.

MPCC chuan Chief Minister Pu Lalduhoma sorkar chu Ministry of Home Affairs thu hnial ngam lova, state danga inthlan duty a kal tur Police 1,047 te vote an thlak theihna tur ruahmanna siam lovah an puh bawk a ni.

<><><>

X-RAY MACHINE

Adviser to Chief Minister (Political) Pu Lalmuanpuia Punte chuan vawin khan Aizawl a a pisa atangin Hrangturzo bial chhunga damdawi-ina dah tur X-Ray khawl sem chhuahna hun a hmang.

Pu Lalmuanpuia Punte hian MLA fund atanga lei Biate Community Health Centre, East Lungdar Primary Health Centre leh North Vanlaiphai Primary Health Centre te hman turin X-Ray khawl a sem chhuak a. He'ng CHC leh PHC-ah te hian hmun thenkhatah X-Ray khawl a awm lova, thenkhatah hman tlak tawh loh a awm thung a. Sem chhuahna hunah hian hriselna lam leh zirna chu a ngaih pawimawh ber a nih thu sawiin Hrangturzo bialtu MLA chuan mipui tam thei

ang berin an chhawr tur thil chu MLA fund hmanna atana a duhdan a nih thu a sawi a. Hriselna leh zirna chu hmasawna bul ber pakhat ni a a ngaih thu a sawi a ni. Khawlailung PHC tana a leisak ve rih loh chhan chu a khawl khawihthu tur X-Ray technician dah a nih ve loh vang leh a dahna tur hmun a awm rih loh vang niin a sawi a, a tul anga la bawhzui a tum thu a sawi bawk.

X-Ray khawlte hi a bunna senso zawng zawng nen pakhat cheng nuai 6 man vel a ni a. He'ng CHC leh PHC a thawkte'n sem chhuahna lehkha hi dawngin lawmthu an sawi bawk a ni.

<><><>

MZP AND REFUGEES

Champhai MZP Hqrs. hruaitute chuan vawiin khan Champhai khawpui chhunga Mizo n lo dan lova sumdawna kalpui an awm leh awm lohte enfiain Myanmar atanga raltlan te an awmna hmunah tlawhin Dan lova chetna laka fimkhur turin an hriattir.

Hnamdangte, Mizorama zalen taka sumdawnga, lirthei hmanga bungrua an zuar kual thinte chu dan kalh a ni tiin MZP hqrs. Champhai chuan nasa taka dolet a tum a ni tih leh ILP in a huam chin bak Mizorama awm phal a nih loh thute hmandangte chu an hrih a. Two Wheeler taxi driver te zingah pawh India mi ni lo, raltlante zingah driving licence nei a lo service ve mek an awm leh awm loh pawh an enfiain nghal bawk.

MZP Hqrs. hruaitute hian Zote khaw dai, Fianrial tlang bul, ITI building Myanmar raltlante awmna hmun tlawh nghalin, he hmunah hian Myanmar raltlan mi 116 an awm mek a. He'ng mite hi Mizoram Sawrkar, Kohhran leh tlawmngai pawl hrang hrangin tha taka an lo dawnsawn thute hrih an nih rualin India khua leh tui chauhin an neih theih Photo Identity Card, Driving Licence, Aadhaar Card, Ration Card, Birth Certificate te neih lo tum ve lo turin an chah a. Hengte bakah hian Ruihhlo tawlhna a inhnamhnawih lo tur te, mi huan lo rama thlai, Sangha khawi leh thil dangte a ruka lak sak lo turin Champhai MZP Hqrs. hruaitute chuan an hriattir nghal a ni.

<><><>

LOK SABHA

Lok Sabha inthlan thawsarihna leh a tawpna ber chu vawiin khan tluang taka neih a ni a. Inthlan thawsarihna hi Parliament Constituency 57 ah neih a ni a. State leh Union Territory pasarihah huamchungah niin Uttar Pradesh leh Punjab ah seat 13 ve ve, West Bengal ah seat 9, Bihar ah seat 8, Odisha ah seat 6, Himachal Pradesh ah 4, Jharkhand ah 3 leh Chandigarh ah pakhat a ni a. Cndidate 904 an awm dawn a ni.

Hriat theih chinah tlai dar 5 thleng khan vote zaa 58.3 a tla a.

Inthlan thawsarihnaah hian voter vaibelchhe 10 leh nuai60 an awm a ni.

Candidate langsar zingah hian Prime Minister leh senior BJP leader Narendra Modi, Union Minister leh BJP leader Anurag Thakur bakah Congress leader Vikramaditya Singh leh TMC leader Abhishek Banerjee te an tel a ni.

Inthlan thawsarihna rual hian Odisha-a Assembly bial 42 ah vote thlak a ni bawk.

<><><>

COIMMERCIAL LPG

Tuialhthei zuartu company te chuan eirawngbawlna Commercial LPG gas man chu unit khatah cheng 69 leh duli in an tihnam. Indian Oil Corporation Limited (IOCL) chuan tunah hian Delhi ah Commercial LPG bur khat hi cheng 1676 anih thu a sawi a. Kolkatta ah cheng 72 in tlahnam a, Mumbai ah cheng 69 leh duli, Chennai ah cheng 70 leh duli in a tlahnam a ti a. Commercial gas man thar hi vawiin atanga hman tan tur a ni a. Hei bakah hian thlawhtheihna in tuialhthei a hman Jet Fuel man pawh zaa 6.5 a tihnam a ni bawk.

<><><>

INDIA BLOC

Inthlan thawhsarihna leh a hnukung ber zawh anih tak avangin vawiin tlai khan opposition intelkhawm INDIA bloc te chu New Delhi ah an inhmukhawm a. He hunah hian an hmalam huna kal zel dan tur leh vote chhiar nia an ruahmanna te an sawiho a. Opposition hruaitu zingah Jharkhand Chief Minister Champai Soren, RJD leader Tejaswi Yadav leh Aam Aadmi Party hruaitu leh Rajya Sabha MP Raghav Chadha te pawh an tel a ni.

<><><>